

Submisaun ba Parlamentu Nasional

Hadiak Lei no. 4/II/1, Lei Tributaria Benefisiu ba Sidadaun tomak

Audensia ho Comisaun C, PN

14 Marçu 2008

Introdusaun

Organizasaun Sossiedade Sivil tuir knaar ida-idak nian, tulun Estadu liu husi haklaken diskusaun kona-ba politika kona-ba reforma taxa ho foka atensaun ba nesesidade ba justisa sosial. Prosesu hodi involve sossiedade sivil iha diskusaun kona-ba taxa importante iha parte ida, organizasaun sossiedade sivil sira bele hato'o sira nia perspetiva kona-ba impaktu husi taxa ba moris nasaun nian.

Organizasaun balun sei foka sira nia atensaun ba impaktu ba rendimentu seluk ne'ebé importante tebestebes hodi dulas roda Estadu nian (atividades Governo nian). Forum Tau Matan (FTM) representa FORUM ONG-TIMOR LOROSA'E (FONGTIL) sei foka deit atensaun ba implikasaun husi politika kona-ba taxa nian, ba kbiit Estadu nian atu bele mantein nesesidade importante sira hanesan nesesidade ba edukasaun, saude diak, seguransa, programa seguransa sosial sira no mos kbiit instituisaun iha nasaun atu bele jera jestaun taxa no investimentu.

Politika Governo nian atu hatuun taxa folin, sai taxa baratu iha mundu hanesan loke wee dalan atu wee sulin libre mai Timor. Analojia ne'e atu dehan, merkadu libre sei sulin mai Timor-Leste. Iha parte ida, sei halo mudansa rapidamente iha kresimentu ekonómia. Maibe, iha parte seluk, sei sobu merkadu lokal no investodóres nasional ne'ebé seidauk perparadu atu kompete iha merkadu libre.

Bainbain kalkulasaun kona-ba se mak sei tutur taxa todan liu depende ba todan ka kmaan husi taxa ne'e rasik ba rendimentu individual, sasan, no service. Iha kazu ida ne'e taxa ba rendimentu, nia sistema ne'e katak se mak rende barak nia seluk barak.

Taxa mak defesa ba nasaun ida atu bele detekta produsaun ne'ebé tama, kuandu nasaun ne'e iha kbiit atu bele halo seleisaun ba produsaun ne'e tama mai ita nia rain. Iha parte seluk, mos administrasaun taxa mak bele kontrola limitasaun ba sasan ne'ebé tama.

Hatuun taxa nia impaktu saida iha futuru? Resposta ba perguntas ida ne'e seidauk bele hataan, persiza estudu ba oin atu bele haree impaktu husi Lei Tributaria ba seitor idaidak iha nasaun Iiu husi analiza no halo interpretasaun ba dadus ruma husi mudansa ne'ebé mai husi impaktu lei ne'e.

Prinsipalmente, presensa organizasaun sossiedade sivil iha Parlamentu Nasional hodi hato'o hanoin ruma kona-ba lei ne'e, hatudu ona papel sossiedade sivil nian iha debate kona-ba nasaun nia rendimentu hira no nasaun gastu hira ba moris nasaun nian.

Iha situasaun ida ne'e, RDTL liu husi Lei Tributaria no Lei Investimentu, hala'o hela saida mak bainbain hanaran ekstensifikasi no intensifikasi taxa ho objetivu atu bele hasa'e tax coverage ratio (meningkatkan subyek dan obyek pajak).

Rendimentu RDTL nian iha pasadu prosentase ass mai moos husi taxa tanba taxa folin ass. FONGTIL iha okasiaun balun, kestiona tiha ona taxa nia folin ne'ebé ass liu no bainbain fo todan ba populasaun ki'ik atu bele asesu ba nesesidade baziku sira.

Haree ba esbosu lei tributaria nian, hatudu katak taxa folin sei baratu liu maibe laiha mudansa taxa folin ba sasan nesesidade baziku. FONGTIL hanoin, bainhira iha ona mudansa ba folin taxa, diak Estadu hahu perpara ona lista negativu (free tax) ba sasan sira ne'ebé importante ba povu nia moris atu nune'e bele baratu nafatin iha merkadu. Ida ne'e mos hanesan medidas hodi tulun povu kiak sira atu bele "bosu uluk mak foin bele selu taxa".

Iha predisaun ida katak bainhira nesesidade baziku sira baratu, sei hakbiit sira ne'ebé kbiit laek atu bele selu taxa, iha parte seluk bele kontra asumsi katak taxa baratu sei promove klasse sosial ne'ebé ass entre klasse kiak ho klasse riku.

Iha nasaun barak, debate kona-ba taxa bainbain involve deit ema rikaxu no businessman sira. Maibe iha Timor-Leste, ho fornese oportunidade ba organizasaun sosiedade sivil iha PN atu bele hato'o hanoin ruma kona-ba lei ne'e, signifika katak akontese ona prosesu ida diak iha ne'ebé, loke oportunidade ba organizasaun sosiedade sivil atu bele hatene kona-ba impaktu husi lei ne'e ba sidadaun tomak.

Forum Tau Matan (FTM) hetan fiar husi Forum ONG-Timor Lorosa'e (FONGTIL) atu hato'o perspetiva sosiedade sivil nian ba Lei Tributaria ne'e ho foka atensaun ba aspetu justisa sosial. Hanesan organizasaun baseadu ba direitus umanus, submisaun ida ne'e sei foka deit perspetiva ruma kona-ba impaktu husi Lei Tributaria ba justisa sosial.

1. Taxa Relasaun ho Korupsaun

FTM hanoin katak reforma taxa tenke tuir kedas ho reforma ba administrasaun taxa nian. Ofisio Estadu nian ida ne'ebé importante tebestebes kona-ba rendimentu Estadu nian mak Alfandega (Custom Unit). Iha ona alegasaun korupsaun iha relasaun ho servisu Alfandega nian iha Timor-Leste. Perkupasaun ida katak ema rikaxu no bisnisan sira hetan vantajen barak husi administrasaun taxa nian ne'ebé fraku. Tanba sira mak selu taxa barak liu, possibilidade katak sira bele halo konspirasaun atu bele menus iha selu taxa ba sira nia importaun.

Taxa baratu hanesan medidas ida hodi hasa'e insentivu investimentu, sei afeta ba sasan tama libre no mos ho kuantidade ass. Bainhira kapasidade kontrola menus, droga no alku bele tama ho libre ho kuantidade ass mos. Situasaun ida ne'ebé sai perkupasaun tiha ona mak joventude no droga. Timor-Leste seidak iha estandar lejislasaun kona-ba idade minimu responsabiliza ba krime. Seidak iha mos lei kona-ba idade bele konsumu alku. Bainhira sasan negatihu sira tama ho kuantidade ass, possibilidade risku ba foin sa'e sira mos sei ass.

Sigaru tama ho kuantidade ass, kontradis ho politika saude nian kona-ba hapara sigaru. Iha parte seluk, kbiit Alfandega no Imigrasaun nian atu kontrola produsaun negatihu husi estranjeru mai Timor seidak maximu. Possibilidade risku ass ba "illegal smuggling" ba droga no alko mai Timor-Leste bele ass.

Ekonomista sira hateten politika taxa nian de faktu iha Timor-Leste hanesan medidas ida atu promove insentivu iha servisu no hasa'e investimentu. Maibe, bainhira fraku iha administrasaun taxa, mak sei hamosu korupsaun ass.

Perkupasaun ida ne'e iha relasaun ho rendimentu ne'ebé Estadu kolekta no distribuisaun rendimentu. Papel sosiedade sivil nian atu garante katak Timor-Leste sei iha sistema taxa ida ne'ebé efisien iha sintidu katak, taxa sei hasa'e kresimentu ekonómia. Nune'e, bele promove distribuisaun rendimentu ida ne'ebé justu ba sidadaun tomak.

Rekomendasaun ba Estadu, persiza hametin sistema kontrola ba Alfandega liu husi hadiak administrasaun taxa nian iha parte ida, no iha parte seluk, tenke estabelese medidas legal ne'ebé apropriadu tuir kontestu lokal atu garante transparensia no akuntabilidade. Atu nune'e, rendimentu husi taxa bele responde duni ba nesesidade iha nasaun no bele kobre sidadaun tomak.

2. Taxa mak Rendimentu Hodi Dulas Roda Governasaun

Situasaun aktual, ekonomikamente Estadu uza rendimentu husi taxa hanesan taxa ba salario, taxa ba konsumudóres, taxa sasan importa-export no taxa husi rendimentu mina tasi Timor nian. Prediksaun ida katak, liu husi hatuun taxa folin sai baratu iha mundu hanesan medidas insentivu ida atu dada investimentu mai Timor. Iha lian seluk katak, produsaun internasional sei sulin mai Timor.

Perkupasaun balun katak, sei akontese invasaun boot ba produtu lokal, halakon kuantidade no

kualidade produitu lokal ne'ebé seidak perparadu atu kompete. FTM hanoin Governo persiza estabeselese politika quotation katak quotasun ba produitu importa atu bele promove produitu lokal iha parte ida, iha parte seluk, Lei Tributaria tenke tau ba konsiderasaun aspeitu medidas insentivu hodi promove produsaun lokal nia kuantidade no kualidade liu husi dalan rua; hakbiit kapasidade produitu lokal no manutensaun ba komoditi baziku no komoditi vital sira ne'ebé importante ba produsaun.

FTM hanoin Governo persiza kria politika hodi promove investidores nasional atu nune'e bele kompete ho investidores internasional. Iha parte seluk, tenke limita investidores internasional ne'ebé investe ho modalidade ki'ik tanba investidores ki'ik sei hamate investidores lokal.

3. Taxa ba Konsumudór

Reforma taxa ho folin baratu ka todan, nafatin sei la fo mudansa ba konsumudór iha Timor-Leste. Taxa konsumu bainbain tau hamutuk ona ho sasan no service husi sasan ne'ebé faan. Konsumudór mak lori todan husi taxa, maiske konsumudór la selu direta taxa husi sasan ne'ebé sira sosa ba Governo, tanba taxa inklui ona iha folin husi sasan ne'ebé sosa. Tanba ne'e taxa konsumudór bainbain hanaran "taxa indireta".

Ba importansia transparensia, FTM hanoin Governo persiza estabeselese sistema taxa ida iha ne'ebé konsumudór persiza hatene sira sei hira ba kada sasan ne'ebé sira sosa. Ezemplu, bainhira sosa sasan ida iha loja, tenke iha ona informasaun kona-ba taxa folin hira ba sasan ne'e. Sistema ba taxa hanesan ne'e bele halakon possibilidade korupsaun direta husi investidor ba konsumidor sira no bele mos halakon possibilidade manipulasaun ba sasan folin. Liu-liu tau ba konsiderasaun ass katak iha Timor-Leste sasan folin entre loja ida ho loja seluk dala barak la hanesan, maiske sira faan produsaun ne'ebé hanesan ho kualidade hanesan moos.

4. Taxa ba Meiu-ambiente

Impaktu direta ka indireta ba meiu-ambiente no merkadu ne'ebé la justu mos se ko'alia iha submisaun ida ne'e. Husi perspetiva saude ambiental, taxa ba meiu-ambiente refere ba rendimentu husi taxa atu bele uza hodi kobre atividades produsaun sira ne'ebé fo impaktu direta ka indireta ba comunidade nia moris. Ezemplu, industria ruma ne'ebé produs polusaun perigu ba ambiental no ba saude populusaun tomak iha area iha ne'ebé industria ne'e hala'o ba.

Husi perspetiva ekonomista, taxa hanesan ne'e sei promove efisiensia ekónomia liu-liu atu bele nafatin hetan responsabilidade individual no bisnis (Import and Invesment Duties) sira atu bele iha responsabilidade ba sira nia desizaun bainhira hanoin atu halo investimentu ba produsaun iha Timor-Leste no mos promove sensibilidade umana ba povu kiak iha rai ida ne'e.

Bainhira iha medidas taxa hanesan ne'e, importante duni ba manutensaun ba meiu-ambiente no komitmentu ba mudansa klimatu iha mundu.

Perpara husi:

Joao Soares Reis Pequinho,
Coordenador Ezekutivu
Forum Tau Matan - Eyes on Human Rights
Hp. (+670) 724 2099 / E-mail: ftm121203@yahoo.com

Informasaun liu tan bele kontatu:
Sekretariadu FONGTIL
Hp. (+670) 725 4912.